

# TAZKIRAH

## Kecintaan Sahabat Kepada Rasulullah saw

Dari 'Aisyah r.a katanya : "Ada seorang lelaki datang kepada Nabi SAW seraya berkata :

"Wahai Rasulullah engkau lebih aku cintai daripada diriku sendiri dan engkau lebih aku cintai daripada orang tuaku. Jika aku berada di rumah, aku sentiasa merinduimu dan tak sabar untuk bertemu dan melihatmu. Apabila aku teringat kematianku dan kematianmu, tetapi aku tahu engkau kelak dimasukkan ke dalam syurga, tentunya engkau akan ditempatkan di syurga yang paling tinggi beserta para Nabi. Sedangkan jika aku dimasukkan ke dalam syurga, aku takut jika kelak tidak dapat melihatmu lagi".

Nabi SAW tidak menjawab ucapan orang tersebut sampai Jibril menurunkan firman Allah yang bermaksud :

"Dan sesiapa mencintai Allah dan RasulNya, mereka itu akan bersama-sama dengan orang-orang yang dianugerahi nikmat oleh Allah yaitu para Nabi, para Shiddiqiin, orang-orang yang mati syahid dan orang-orang soleh. Dan merekalah teman yang sebaik-baiknya". (An Nisaa': 69) (Thabrani, Abu Nuaim. Al-Hilyah. 4/240)

Dari Ibnu Abbas ra dikatakan ada seorang lelaki datang kepada Nabi seraya berkata :

"Wahai Rasulullah! Aku sangat mencintaimu dan selalu mengingatimu. Tapi yang aku takutkan jika kelak engkau dimasukkan ke dalam syurga di tingkat yang paling tinggi sedangkan aku dimasukkan di tempat yang tidak sama denganmu, maka aku takut tidak dapat lagi melihatmu kelak di akhirat".

Rasulullah SAW tidak menjawab ucapan lelaki itu sampai Allah menurunkan firmanNya iaitu ayat 69 surah an-Nisa'.

Setelah itu Rasulullah SAW membacakan ayat tersebut di hadapan lelaki itu dan mendoakanya." (Thabrani, Al-Haitsami. 4/7)

### Kecintaan Sa'ad bin Mu'az ra

Dari Abdullah bin Abu Bakar ra katanya : "Sesungguhnya Sa'ad bin Muaz ra berkata kepada Nabi saw :

"Ya Rasulullah! Mahukah engkau kami buat sebuah benteng dan kami siapkan di sisimu sebuah kenderaan. Kemudian kami maju berhadapan dengan musuh, jika kami diberi kemenangan oleh Allah maka itulah yang kami harapkan. Tetapi jika terjadi sebaliknya, maka engkau dapat segera pergi dengan kenderaan ini dan menemui pasukan kita yang masih ada di belakang kita. Sebab di belakang kami tertinggal sejumlah kaum yang sangat mencintaimu. Andaikata mereka tahu bahawa engkau akan berperang pasti mereka akan ikut semuanya. Akan tetapi oleh kerana mereka tidak tahu bahawa engkau akan menemui pasukan musuh seperti ini, maka tidaklah hairan jika sebahagian orang tidak ikut bersama engkau."

Maka Rasulullah saw menyatakan penghargaannya dan mendoakan kebaikan baginya, kemudian mereka membangunkan sebuah benteng untuk Nabi saw. (Ibnu Ishaq, Al-Bidayah 3/268)